

PBB : Rantau Asia Pasifik Pengukuh Kestabilan Ekonomi Dunia
Bernama
15 Mei, 2012
Daripada Manik Mehta

NEW YORK, 15 Mei (Bernama) -- Walaupun impak kelembapan ekonomi dunia turut menjejaskan rantau Asia Pasifik, namun ia masih merupakan kawasan yang paling pesat berkembang di dunia dan menjadi pengukuh kestabilan ekonomi dunia.

Laporan Pertubuhan Bangsa Bersatu (PBB) "Kajian Ekonomi dan Sosial Asia dan Pasifik 2012: Meneruskan Perkongsian Kemakmuran dalam Era Kemelesetan dan Harga Komoditi Yang Tinggi", menunjukkan turun naik harga komoditi merupakan satu lagi kebimbangan utama Asia Pasifik, yang sudah berhadapan dengan trend peningkatan komoditi dalam jangka panjang.

Kajian oleh Suruhanjaya Ekonomi dan Sosial PBB bagi Asia dan Pasifik (ESCAP) itu menyebut kadar pertumbuhan ekonomi membangun di Asia Pasifik akan perlahan kepada 6.5 peratus pada tahun semasa, penguncupan daripada 7 peratus pada 2011 dan 8.9 peratus pada 2010.

Bagaimanapun, kelebihan utama pertumbuhan yang perlahan ini menyebabkan kadar inflasi yang rendah di rantau ini yang dijangkakan susut daripada lonjakan 6.1 peratus pada 2011 kepada 4.8 peratus tahun ini.

Noeleen Heyzer, Pengarah Eksekutif ESCAP yang membentangkan laporan itu pada mesyuarat di Bangkok baru-baru ini berkata Asia Pasifik akan terus berhadapan "persekitaran luar yang mencabar", yang menjadi fokus kajian 2012 ini bagi mengariskan landskap dalam membantu mengharungi gelombang dan turun naik harga.

Walaupun kelembapan akan menjejaskan pertumbuhan, kedinamikan ekonomi rantau ini dijangka meningkat memandangkan faktor Chindia (China-India) akan memainkan peranan ekonomi yang penting pada masa akan datang.

Pertumbuhan China dijangkakan mencecah 8.6 peratus dan India sekitar 7.5 peratus pada tahun semasa.

Ramai pakar dalam badan berkaitan PBB juga yakin terhadap Asean yang dilihat sebagai rantau pertumbuhan dengan pasaran menarik yang menggabungkan 600 juta penduduk.

Heyzer mengunjurkan ekonomi Selatan-Selatan dan interaksi dagangan dengan Asia Pasifik pada 2012 akan membantu rantau membangun yang lain seperti Afrika dan Latin Amerika mengurangkan lagi pergantungan mereka ke atas ekonomi membangun pertumbuhan rendah, eufemisme bagi pasaran tradisi negara membangun.

Laporan itu juga menyebut mengenai cabaran dan pilihan untuk ekonomi Asia Pasifik yang perlu mengimbangi antara pertumbuhan dan inflasi, menangani aliran modal, dan turun naik tukaran asing serta mengatasi masalah pengangguran yang semakin tinggi.

Ia mendapati rantau ini perlu menyasarkan pertumbuhan yang lebih terangkum. Ini adalah berdasarkan tahap pendapatan yang tidak seimbang yang telah meningkat 15 peratus di negara membangun di Asia Pasifik sejak tahun 1990-an.

Perbezaan pendapatan juga menghalang kemajuan sosial di rantau itu, kata Heyzer.

Oleh itu, tugas utama ialah memastikan peluang pekerjaan tambahan diwujudkan.

Laporan itu juga mengetengahkan lebih daripada satu bilion pekerja di Asia Pasifik mudah terjejas, yang bermakna pekerjaan mereka tidak stabil dan boleh ditamatkan bila-bila masa, memandangkan negara membangun gagal menjana peluang pekerjaan yang mencukupi dalam sektor formal.

Golongan muda adalah lebih daripada tiga kali ganda terdedah untuk menjadi penganggur berbanding golongan dewasa, dengan kadar pengangguran dalam kalangan belia diunjurkan kekal pada 10.2 peratus pada 2012.

Sementara itu, satu lagi laporan Program Pembangunan PBB (UNDP) mengingatkan Asia Pasifik tidak mampu untuk "berkembang dahulu dan membuat pembersihan kemudian", yang merujuk kepada masalah alam sekitar yang semakin besar.

Laporan UNDP itu menyebut dalam pada rantau ini mengalami kemakmuran ekonomi, ia juga perlu mengambil langkah untuk melindungi alam sekitar dan mewujudkan pekerjaan untuk golongan miskin dalam sektor pembuatan, perladangan dan penjana tenaga.

Laporan "satu bumi untuk dikongsi" disediakan oleh satu pasukan yang diketuai ketua UNDP Anuradha Rajivan.

Beliau berkata segala tindakan di Asia Pasifik, yang didiami lebih daripada separuh penduduk dunia dan satu pertiga daripada muka bumi bertanah, akan menjejaskan keseluruhan dunia.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=666197>